

Ou Cret, le devindro 18 d'oktobre 1984

Autor(en): **[s.n.]**

Objekttyp: **Article**

Zeitschrift: **L'ami du patois : trimestriel romand**

Band (Jahr): **12 (1984)**

Heft 47

PDF erstellt am: **28.04.2024**

Persistenter Link: <https://doi.org/10.5169/seals-241183>

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

ECHOS DE LA

ROMANIE

ET D'AILLEURS



Pages fribourgeoises



OU CRET, LE DEVINDRO 18 D'OKTOBRE 1984



Chi devindro né l'i avi ou Crêt le syndicat di patêjan fribordzê. Kan no chin arouvâ, pè lè vouèt'arè è otyè, lè hyotsè chenâvan. Mè krèyé k'irè por no, ma Djan de la Nê no j'a de : le mohyi l'è tot'èhyiri, l'i a la mècha, no fô li alâ, le pape n'in d'a dèvejâ dariremin. No j'an j'ou mil mô dè li fère a konprendre ke l'afère chè pachâvè ou kabarè è ke l'i avê, lé, achebin 'na krê. L'i avi

galéjamin dè dzin ma ne fayi pâ tan butha po intrâ din la châla.

No j'an keminhyi la tenâblya a l'ara, avu on piti vin menuté dè rêtâ. Le prèjidan, Francis Brodard, don no j'a ti chaluâ, chuto

lè fèmalè, n'in d'avi prà è di balè, avi di prèjidan dè totè choàrtè, di dèputé, di chindike, enfin dè to, mimamin di profacheu. L'a de ke voli nyon oublyâ, ma l'a kan mîmo oubyâ dè chaluâ Tata k'irè portan pâ bin yin dè li. Kan l'é inbranchya dèvan dè modâ irè adi iràja.

Chu chin la chèkretére Anne-Marie Yerle dè Trivô l'a yè chin ke no j'avan dèbyotâ ou Mouret l'i a dou j'an.

No j'an adon j'ou 'na chorèprècha, no j'an yu intrâ 'na mache dè galéjè brechàlè in dzakiyon è di bî j'armayi, iran 'na brejolâye ke l'an fèrmo bin tsantâ, in patê è in franché. No j'èthan ti gayâ benéje dè lè j'oure è le préjidan l'a de k'on avi atan dè pyéji dè lè vouti tyè dè lè j'oure, ke règrètâvè dè pâ avi thinkant'an dè min po povi rè alâ i fiyè pêchyàtre.

Cha dàthe, ouna bala nîrâye pâ bin yin dè mè le vuitivè dè grébo, ché pâ chin ke l'arè bayi in'apri.

Pu la dama dè Trivô no j'a de chin ke l'i avi d'èrdzin din la tyéche. Kemin i châ farmo bin le patê no j'a de : je veux vous donner connaissance de la situation financière de notre société. Dè chin ke l'é konprê l'i a tyindzè thin fran dè min tyè l'i a dou j'an. To le mondo irè kontin, tapâvan din lè man, ma mè iro pâ d'akoâ. Mon onhyo Ujane (le bon Dyû le betiche in bon rèpou, l'yè dyora le momin, l'y a karant'è chat'an ke l'è moâ) mon onhyo Ujane don me dejê totêvi : po chavi che tè konto chon dyuchto konta le matin chin ke t'â din ta bochèta è rè le dèvélené, che t'â mé le dèvélené, tè konto chon dyuchto, che t'â min, chon fô ! Mon onhyo Ujane chavi prou kontâ, chè j'èretâ l'an fi dichkuchyon. Volé don dre ôtyè ma techè ke yon ch'abadè è di ke lè konto iran in rêya, ke l'è j'avi kontrolâ, ke fayi pâ chè fére dè pochyin vu ke l'omo de la dama tinyè 'na banka, la banka inpoutikâye ke l'a de, krêyo. L'é don pâ pipâ on mo.

Pu le préjidan l'a fê chon rapoâ. L'a de i fèmalè k'èthan inke ke dèvechan aprindre le patê a lou j'infan dza kan lè j'avan chu lè dzenà è ke fayi li moujâ kan n'in d'aran. L'an tré totè de vouê.

L'i a ouna noval amikale, ha de la Grevire, no j'an ti bramâ dè dzouyo. L'an ke vin cherè l'anâye dou patê, fô chin inkotchi dè djija, hou dè Trivô chon dza in tsan, i inkotson on opèra, chin n'è pâ rin.

Apri chin no j'an oyu lè préjidan di j'amikale. No j'an de chin ke chè pâchè intche là. Pu pâ lè nomâ ti, m'in rapèlo pâ mé, du la dèrire michyon mè chu fê viyo, l'é rin mé de mémoire. Dè chin ke lè ratinyè lè Tryolè van deché delé, hou dè Pochi chon j'ou in Valè bère di j'êrbè, lè Yèrdza dè Remon l'an tyà mé di j'alonyè a roudji, on yâdzo l'avan di kotyè, l'afére l'è a la béche. Lè pekôji krèthon

din on indrê ke chè di la Koûtha. Hou inke van bêre dou vin in katson dèjo le hyotchi la demindze du la mèche. L'i a onkora lè Grahyàjè dè Lojena, le Botyè a Tobi dè Vevê, hou dè Grandze-Marnin, le Mèthadji dè tsathi, mè krêyo ke chu ou bè. Lè jon l'an dzuyê di pîthè dè téâtre in patê, di j'ôtro l'an fê 'na bala korchâ, chuin yô fan di konkour in patê, chin l'è bin. Yon no j'a invitâ po l'an ke vin : vinidè avu no kan no farin nouthra chayête, l'i arè prou vikaye è proumatêre a bêre, ma no j'a pâ de yôn è kan cherè.

Vu pâ oubyâ madame Marie-Louise Goumaz, préjidan de patêjan du tyinton dè Vô ke l'a èchtra bin dèvejâ è bin mothrâ ke le patê vodouâ, kemin ti lè j'ôtro "chon din bon frârè" kemin l'a de le règrètâ Dèni din Bou.

Apri l'è vinyê le toua di profacheu, yon ke travayè pè la radio è ke dèfin nouthra viye linvoua, on 'ôtro ke l'è din 'na fabre-ka yô ke beton le patê in konchèrva, on trèjimo, ché pâ chin ke fâ, pâ vouéro mè moujo, ma chon ti di grô hyintâ è l'an keminhyi a lou marmadji, volan ti n'in chavê mé l'on tyè l'ôtro.

Le prèjidan irè farmo innoyi, voli pâ inparâ l'un métyè l'ôtro, voli pâ chè fére a mô vère, kudyivè dè l'è j'adôlâ è l'a ravuchê. L'è on omo dè rêthèta nouthron préjidan, chin k'on'apalè "on diplomate" pâ chin k'on medzè ma on vretâbyo. Le nomèran on dzoua député ke m'èthenèri rin.

Intrè tin le kâ mèhyâ no j'avi rè intrètsantâ avu dutrè galé redzingon.

No j'an onko oyu le chindike dou Crêt, moncheu Fâvre ke no j'a fèrmo gabâ cha kemouna è ke l'avi réjon. Po fourni l'ami Franthê Mauron no j'a fê a chavê ke cha tsata l'avi fê katre piti chu le ganapé, chu chin l'a bramâ : vive le patê fribordzê. No j'iran ti to byè dè chin oure.

Lè dinche ke ha bala vèya chè fournête, no j'an bin ruju, rèyu di bon j'ami, bu 'na tota pitita gota è rèvinyê to dzoyà intche no. La ya l'è bala.



Le réchyâ